

Lettre Jèrriaise (33) Sanm'di lé 17 (dé) Mai d'2025.

Bouônjour, bouonnes gens et ch'r'est mé, David Mathet, tch'a l'pliaïsi d'vos présenter la Lettre Jèrriaise acouo eune fais, aniet Sanm'di lé 17 d'Mai 2025.

Pouor c'menchi tchi bouonne célébration qué j'avions ieu pour la quatre-vingtchième commémoration d' la Libéthâtion'. Toutes les Pâraïsses ont fait hardi bein. Mais i' faut qu' j'expresse mes félicitâtions à Sarah Grigson et sén êtchipe pour la mèvèilleuse exhibition à St Jean. Nou-s'-éthait peu y pâsser pus qu'un coupl'ye d'heuthes à r'garder tout ch'na.

À St Martîn, j'eûnmes un bein bouôn Tea Party et un r'pas à la broche pus tard, eune belle exhibition d'fleurs à l'Églyise, des bieux sèrvices, conduits par lé Recteu, et not' Madame

la Connêtabl'ye, Karen Shenton Stone, fit eune bein bouônne adresse au sèrvice en Ville.

J'tais à èrfliéchi, dreinement, sus toutes les bénédiction dé tchi nou s'rêjouit dans not' précieuse p'tite Île. Eune île avec eune populâtion la même chose comme eune ville bein moyenne ailleurs.

Par exempl'ye j'avons eune longue histouaithe bein célébrée dans nos mûsées et eune richesse dé livres et d'èrcords. J'avons bein des gens des jours jadis et d'aniet tch' écrivent en prose et poésie dé bouonne qualité.

Ch'est la même chose avec les arts visuels et pliaïstiques. Nou-s'-a seulement à visiter les exhibitions à L'Eisteddfod pouor vaie la qualité des étudiants dans nos écoles. Ch'est tout à fait mèvèilleux.

J'avons eune tchultuthe et littératuthe dans not' langue Jèrriaise hardi précieuse, comme jé l'savons. Les arts dramatiques sont bein r'présentés par plusieurs Clobbes et Associâtions dramatiques îchin en Jèrri et d'aut' tchi nos visitent d'ailleurs.

Pour mé, la musique est bein împortante. Et tchi richesse là étout! Qué ch'na sait les jannes avec lus musiques modernes ou nos orchèstres comme l'Orchestre Ste Cecilia, l'Orchestre dé Chambre dé Jèrri ou lé grand Orchestre Sÿmphonique dé Jèrri. Et touos les tchoeurs tch'i' y' a siez nous! Comme j'tais à dithe la dreine fais: "À sé d'buter sus les êpaules des géants"; ch'est un grand' honneu qué nos musiciens sont supportés par des musiciens dé parmi les Orchestres professionnels en Angliètèrre. Quand j'compathais les résultats au

jour d'aniet avec les siens d'ma jannèche – et bein, i' n' y' a pon dé compathaison!!

Dèjà ch't année j'avons ieu eune succèssion dé mangnifiques concèrts: à l'Églyise St Luc (eune hardi bouonne présentâtion du 'Stabat Mater dé Haydn) et à la Chapelle Wesley Grove (un bieu concèrt pour la Libéthâtion); et dans la grand' salle à l'École des Tchennevais (un mèvèilleux concèrt, dirigi par un janne Jèrriais, James Southall). Tchi richesse!

Mais comme toutes bouonnes choses j'dév'thions p'têt' les apprècyi pus qué jé n'faïthons. Comme lé sieur Hilary Davan Wetton, lé chef dé musique dé d'avant d' la JSO, a eplyitchi dans eune articl'ye à la Gâzette, comment qu' ch'est bein împortant qué Jèrri trouve eune autre Salle dé Concèrts à remplichia la Salle Gloucester au Fort. La Salle ès

Tchennevais nouos a bein sèrvi, mais oulle est un mio trop p'tite.

Ch'est eune affaithe dé vision parmi les siens en pouver. Quand i' font lus décisions, ch'est împortant tch' i' considéthent toutes les conséquences avec eune sagesse et responsabilité comme i' faut.

Récemment, à not' Chapelle, j'avons pèrdu eune janne dame, tchi m' avait souôlagi en prannant un nombre dé postes bein essentiels. S'n homme avait 'té am'né en Jèrri par lé Gouvèrnément. Mais tout d'un coup il a 'té mîns bas et i' n'ont autcheune chance dé rester ichîn. I' lus faut s'értouônner en Angliètèrre. Ou 'tait si boulevèrsée Dînmanche pâssé et j'allons la mantchi diversément. Mais i' n'y' a rein à faithe!

Les temps sont changis et ch'est bein pus difficile dé ches

jours. Bein seux, ch'est tréjous trop facile dé crititchi et nou sait, comme nos pathents nos disaient: "les sous né craïssent pas sus les bouais". I' faut bein éspéther qué les siens qu'ont l'pouver, politiciens et officièrs, montréthont grande compréhension et sagesse quand i' f'thont lus décisions.

Et bein n'en v'là assez d'man niolîn, et j'nos allons nouos rapp'ler dé toutes les choses tchi font Jèrri eune île Jouaiyeuse'

Pouor en finni, j'peux-t-i' vos avèrti d'eune visite dé l'Assemblée au Mangni dé Samathés, Sanm'di lé 21 d'Juîn dé 12.30 à 2.30 pour vaie les bieux gardîns et les exhibits du fèrmage dans l'grand bel.

Lé Seigneu, Moussieu Vincent Obard, est bein intèrèssi d'aver d' l'aîgue à trouver les mots Jèrriais pour les ôtis et la machinn'nie parmi ses

exhibits! Né v'là eune p'tite callenge pouor vous. Si ou voulez y v'nîn, membres ou pon, si vos pliaît, lé faithe à saver à ma femme, Ann, sus 862447. Si ou voulez mangi au restaurant, ch'nest pas încliu, mais si vos pliaît donnez vos noms à Ann tout d'même, pouor qué vos noms saient sus la liste qué nou lus donn'na à l'entrée, un jour ou deux d'avant.

Pour achteu, bouonne santé et à bêtôt.

David Marett